

فيه ناس بتمنّ عليك بمعرفتها ووجودها في حياتك، وطول الوقت مستكتره نفسها عليك، وشايفة إنك لازم دائماً وأبدا تعمل المستحيل، عشان تفضل مستحق لنعمة معرفتها، بالتالي لما تتسحل في حاجة، أو دوامة الحياة تجرّجرك من شعرك، أو الزمن يريّح على أمّ رأسك، بيعتبروا دا اعتداء مقصود وموجّه لشخصهم الكريم، فيبتّخذوا مواقف غاية في الحدة والغشومية معاك، مهما كان العشم والعشرة والذكريات المشتركة الي ما بينكم.

أما "التمس لأخيك سبعين عذرا" فبتقلب معاهم إلى: اتلكك لأخيك على أصغر هفوة، وكَمَل على الي باقي منه، وخلّص أي ذنب حد ارتكبه في حقك من جتته!

فإن رأيتَ مثل هؤلاء، فاهرب منهم كما يهربُ السليمُ من الأجرَبِ!



مهما كان الشخص الي اصطفيته عشان تحكي له أسرارك وتحط إيده على مواجعك النفسية ومخازيك -وحتى لو كان في نفس محتتك- عمره ما هيقدر يتحرّر من الحكم الأخلاقي والديني عليك، وهتلاقيه في وسط ما إنت منهار أو بتتوجع يشاور بإيديه ويقول لك: ده غلط وده صح وده حلال وده حرام!

هو مش فاهم إنك عارف كل ده وبتتكوي بيه ليل نهار، وإنه مش جاي لعن الشيخ يوعظه، وحتى لو عم الشيخ وعظه هو مش في المود ده، وإذا كان بيعمل شيء غلط فمش بإرادته ولا مبسوط بيه. في بعض مراحل الخلل النفسي والانهييار، ساعات بيُخيل إلينا إن مشينا الصح وقيمنا ومبادئنا هي اللي وصلتنا لكل الخسارات والفقد اللي بنكابده، فنقرّر نجرب الطريق التاني.. يمكن. الموضوع بيبقى فيه جزء قهري ولا إرادي كبير جدًّا حتى وإحنا واعيين إحنا بنعمل إيه، وممكن -بلا شك- يُقضي بينا لمزيد من الخسارة، لكن مع ذلك بنبقى محتاجين نجرب، ونطرق كل الأبواب المتاحة والممكنة.

ورغم إن الدين مكوّن أساسي في حياتنا، ولا مفر من الانصياع تحت لوائه في النهاية، لكن ساعات بتخرج شوية عن إطاره، بتغلط، بتعيد عن الطريق، مش عشان إنت كافر ومارق وابن كلب قدر ما هي محاولة للتخفف شوية، لعزل العوامل وتحييد الحاجات، ورؤية الدنيا بمنظور جديد والتجربة، والأكيد إن كل واحد ليه حساباته وخياراته في الحياة، ومنظومته القيمية والاجتماعية، والحاجات اللي ما يقدرش يخسرها، ويقينا ما حدش هيحاسب على مشاريب حد.

بتكلم عن الناس العادية، مش أولياء الله الصالحين، اللي بركة يحلوا كل مشاكل الدنيا، وبسجدة يصلوا لليقين وخلصات الأشياء، بتكلم عن ملح الأرض، المهزومين والمحبطين والخائفين والمجروحين والمطعونين والضالين، اللي بيحبوا ربنا وموقنين من رحمته لآخر المدى، وواثقين إنه مش واقف لهم على الواحدة، ولا مستني لهم غلطة عشان يخليهم رماد تذرّوه الرياح، لكن هيمد لهم بساط التجربة وهيصبر عليهم لحد ما يكتملوا.

ولما حد يفتح لك صدره ويفضض لك -بعد سنين كتمان- في الغالب ما بيقاش عايز منك غير إنك تسمعه، يعني لا تحل له حاجة ولا توعظه ولا تباهي بطهارتك في مقابل نجاسته ولا تكذب وتقول له كل شيء هيبقى كويس، فخلي بالك: الكلام اللي هتقولوه في لحظة المكاشفة بالوجع واللهجة والتون بيفرقوا جدا جدا جدا، لأن كلمة واحدة غلط تتقال هتقفله منك للأبد، وتخليه يهرب، مع إنك يمكن تكون آخر إيد ممدودة له!

إحنا مش ملايكة ولا أنبيا ولا معصومين من الغلط، والله العظيم إحنا في منتهى منتهى الهشاشة، منتهى الضعف والاحتياج، منتهى اليأس من كل حاجة وأي حاجة، منتهى التعلق بما هو أقل من القشة، وقرار الكلام مع حد أصلا والفضضة ليه زي الجبل على قلبنا لأننا عارفين إن مفيش حاجة هتتغير، بس بنعمله، عشان نقول لفسنا إننا جربنا وفتحنا قلبنا للناس وحاولنا لآخر لحظة!

والقرارات اللي دايمنا ناخذها بالابتعاد عن الناس، وقفل حياتنا على روحنا، بتبقى جادة وحقيقية وممضية بالقهر والمكابدة، ما بتبقاش تهويش ولا عشان الناس تقول لنا: ما تمشوش، إنتو حلوين وكيوت وإحنا بنحبكم، لكن اللي بيخلينا نرجع تاني كلمة افكرناها لحد فرقت معنا، ذكرى اتحفرت عميقا في القلب أو الأمل- أفيون القلوب- ابن الكلب الأمل، إن فيه حاجة هتتغير!

فما تقطعوش إيد حد اتمدت لكم، وما تحكموش على حد، إنتو -حرفيا- ما تعرفوش أي حاجة عننا، ولا ما كابدناه عشان نقف قصادكم النهارده، ولا الصراعات والوحوش والعفاريات والمواجع اللي بتلتهم

روحنا ليل نهار، خليكم على الحافة، وبيننا وبينكم المودة والرحمة  
والونس.. بس.

عندما يخذلنا شخص، تشيخ كل الأزهار  
التي زرعها بداخلنا فجأة!

طول الوقت بنبعث رسايل استغاثة خفية لي حوالينا، وعلى  
حسب قربهم منا وإيمانهم بإننا نستحق، بيتلقوها أو بتضيع وتتبدد  
في الفضاء السرمدي.

الرسايل مش بس كلام؛ نظرات، ابتسامات، دموع، ستاتيوس على  
فيس بوك، صريخ، دبدبة بالرجلين، هذيان وصوت عالي مش مفهوم،  
شتيمة، اتصال في أنصاف الليالي من غير ما نقول كلمة واحدة، صورة  
عملنا لها لايلك، طريقة معينة في عبور الشارع بلا مبالاة قدام سيل  
العربيات، مسكتنا للشوكة، شربنا للسجاير وإحنا بنكرهها، كتر الشطة  
وإحنا ما بنحبهاش، عدد علب المناديل في إيدنا!

غالبا بنبقى عايزين حد بعينه يقرانا، ويفهم، ويمد لنا إيد،  
حد بيبقى بالنسبة لنا هو العالم والتاريخ والحقيقة المطلقة للوجود  
وتجلي الله الحق، بس مش قادرين نقول له، أو خافين، أو محرجين،  
ومتعشمين إن تاريخنا المشترك يتحرك تحت جلده وينبهه إن فيه هنا  
روح -كانت تخصه في يوم- بتتحرق فعليا ومحتاجة نظرة.

بنبقى وصلنا لنهايات كل شيء؛ العشم والخذلان والصبر والانتظار  
والأمل والمناجاة والحلم والفتوح والتوقع، ومستنينين -للمرة الأخيرة-  
انفراجة، مساحة حرة لالتقاط أنفاسنا بجد، بُشرى، إثبات إننا فارقين  
مع حد ونستحق، تواطؤ كوني في صالحنا ولو مرة، عشان نقدر نبدأ  
من جديد ونكمل مكابدة الحياة ونسد فواتير الوجود!

لكن في الغالب بيكون هو الوحيد اللي ما يفهمش الرسالة، أو  
بيفهمها ويطنش، أو بيفهمها وتاخده العزة بالإثم وينتهزها فرصة  
لتصفية الحسابات، أو بيفهمها ويدرك توحش احتياجنا بس خلاص  
ما بنقاش فارقين معاه، فييسد ودانه ويكمل حياته عادي، فبنزداد  
انكفاء على ذواتنا، وناخذ أحزاننا بالحضن، ونرجع ١٠٠ سنة لورا في  
سلم التطور الإنساني ونلفظ كل الناس، وما تبقاش أي حاجة فارقة  
معانا!

ومن الجحود للنكران للتجبر في قطع رقبة العلاقات للخذلان  
لاستسهال كسر القلوب للعب بمشاعر الصادقين للوحدة المهلكة  
لاعتقادنا المروع إننا دايماً صح ونملك الحقيقة المطلقة لدقات الساعة  
الي ما بتقفش، دايماً بفكر: أكيد ربنا مش هيدخلنا النار في الآخرة..  
نار الناس في الدنيا قامت بالواجب وزيادة، ولا يُعاقب مؤمن على  
الذنب نفسه مرتين أبداً.



إحنا ما بنحسش بقيمة الأشخاص في حياتنا غير بعد ما بيمشوا،  
بنبقى أقوى جداً وإحنا بتلكك لهم ونفتح الباب ونقول لهم بكل  
جبروت: "اتفصلوا.. ما عدناش محتاجين خدماتكم"، أو نفضل نخذل  
فيهم لحد ما يفتحوا الباب من أنفسهم ويفوتوا!

وبعد شوية، آثار إيديهم على أرواحنا بتبان، وبتطالب بالإشباع اللي كان متحقق بوجودهم، أرواحهم الهائمة والشوارع والأغاني والأكل والضحك والمواقف والدموع والوعود والأحلام اللي جمعتنا يوم، بترفع راسها جوانا وتلومنا على الفقد من غير صوت!

بإيدنا بنزوّد وجعنا، ونضعف مقاومتنا، ونفتح مسارات لا حصر لها لنفاد الطاقة وتشتتها، وعشان نهرب من وجع الضمير، بنعمل عملية إحلال وإبدال، بندور على غيرهم -وغالبا بيبقى فيهم شبه من بعض!- لكن مهما اكتملت الحكايات الجديدة بتاعتنا، بيبقى فيها حتة ناقصة، قطعة بازل مش في مكانها، ليها علاقة بالروح والعشرة والصفاء والثقة وانبهار البدايات، ومهما لقينا بديل، عمر الحاجات ما بتبقى زي أول مرة أبدا!

والطريق التاني إننا ننكفئ على ذواتنا، نقفل طريق أي علاقة جديدة، وندي الفرصة لوحدتنا تتوحش، وتلتهم الأخضر واليابس تماما، وتسيينا عظم بلا لحم ولا مشاعر ولا رجاء!

أما الطريق الثالث فإننا نحاول نوصل اللي اتقطع، ونرمم اللي اتصدع، بس خطورته إننا لو ما كناش صادقين وجادين المرة دي، وقادرين على تحمل المسؤولية والاعتراف بتقصيرنا، فالأمر هيبقى هزلي جدا، ومش بس ملوش مستقبل لكنه كمان هيشوّه حتى الماضي اللي كنا بنتسند عليه من حين لآخر!

القلوب أمانات، والمشاعر مراكب سايرة في نور الله من مرسى إلى مرسى، فما تخونوش الأمانات، ولا توقفوا المراكب السايرة!



ساعات كثير بنأجل حاجات نفسنا فيها قوي، وشايفين فيها خلاصنا، خوفا  
من إنها تطلع فشك هي كمان، فنبقى ضيعنا على نفسنا حتى الأمل!



الهاجس الأكبر لينا، إننا نعدّي على الدنيا بلا بصمة ولا أثر، وما  
نبقاش فارقين مع حد!

يمكن عشان كده بنحب ونكتب ونغني ونرسم ونمثل ونرقص  
ونكتب على السوشيال ميديا ونعمل مشاريع، عشان حد ياخذ باله  
مننا، ويلاقي صفات مشتركة معنا فيشاركنا الرحلة، وتسنده على بعض.  
وللسبب نفسه بنتجنن لما نكتشف زيف اللي كنا فيه، والخذلان  
بيبقى مضاعف، لأنه فرغ كل اللي حصل من معناه وخلاه قشرة،  
عيرة، عدم، وخوفنا من اللي جاي، ولخبطنا، وخلصنا مترقبين النهاية  
نفسها ولو بعد حين!

إحنا في منتهى الهاشاشة.. منتهى الاحتياج.. منتهى الطفولة.. وفي  
الغالب بنرضى بحاجات عبيطة وهبلة لو كانت صادقة ومن غير  
ماكياج.

لكن على الجانب الآخر، بعض الناس حساباتها أكثر تعقيدا،  
ودخولهم حياتنا بيبقى مشفوع بخطط وتوقعات ومكاسب وتطلعات  
وليلة كبيرة سعادتك، وللأسف ما بنكتشفش ده دائما غير بالطريقة  
الصعبة!

والمشكلة الأكبر مش إن الحياة صعبة، لكن إنها كان ممكن تبقى  
أجمل من كده بكتير، وأحلى، وأكثر حقيقية، لو حاجات بسيطة

اتغيرت، وناس بعينها فضلوا معنا وكانوا قد كلامهم ووعدهم الي  
ما أجبرنهومش عليها بالمناسبة!

ورغم إن الكل بيخسر في النهاية، حتى الي عامل نفسه بُرم وفاهم  
كل حاجة ومسدد كل الخانات، ماחדش بيتعلم ولا بيستوعب الدرس،  
وليوم القيامة هيفضل الإنسان أغبى من إنه يدرك قد إيه الحياة  
تافهة وهينة ومش مستاهلة الي بنعمله في بعض ده والله!



أغلب مشاكلنا نابع من إننا ما بنعرفش نختار صح: الحبيب/  
الصديق/التجربة/الشغل... وإننا بدل ما نصبر ونجتهد لحد ما نلاقي  
الي على مقاسنا، بنرضى باللي بنلاقيه في سكتنا والسلام، ونحاول نأيف  
مشاعرنا عليه بأي شكل ونقنع نفسنا إن هو ده!

لكن مع أول اختبار حقيقي، وأول لحظة اختيار حرة، كل شيء  
بيبان، وبنكتشف الفخ الي وقعنا فيه، وساعتها، فيه مننا الي بيكابر  
ويكمل ويرضى بنصيبه ويتفرج على الحياة مش يعيشها، واللي بيلف  
ويرجع تاني مهما كانت الخسائر، واللي بيعاند القدر ويحاول يغير  
المقدر، ويفضل يزق لقدام لحد ما يخسر الجلد والسقط!

يمكن لما نحب نفسنا بالقدر الكافي، ونتعود نسمع لها، ونفهمها،  
وما نقامرش بالوقت ومساحات البراح جوانا ونبطل نتعامل مع القلب  
على إنه كورة شراب مهما لبسناه في الحيطه هيرد لنا تاني، ونتخلص من  
طاقة الغضب الي مليانا طول الوقت، الرؤية هتتضح أكثر، وهيبقى  
عندنا بصر وبصيرة أكبر للي يناسبنا في المرحلة دي واللي ما يناسبناش،

لي من توبنا واللي طالع شيطاني في لحظات ضعفنا واحتياجنا، للأصلي  
والفالصو، لي منظر بس واللي حقيقي زي وجعنا!

لكن في كل الأحوال، لكل منا نصيب مفروض من الألم والخيانة  
والخذلان والتخلي والبيع والاستهانة والوجع وكسرة القلب والتوهان  
والحيرة والدمع وغياب الهدف وضياع الطريق، فاللهم -إن لم يكن  
هناك مفر- عَجِّلْ لنا قِطْنَا<sup>(1)</sup> قبل يوم الحساب.



كل يوم لما بنزل عند بوابة 2 في مدينة الإنتاج الإعلامي، بحمل همّ  
المشوار الطويل اللي لازم أمشيهِ عشان أوصل للقناة اللي شغال فيها.

في أيامي الأولى في المكان كنت بستحي أشاور لعربيات زملاء اللي  
بتمر عليا، رغم إنها كده كده هتعتدي على القناة يعني ومش هكلفه  
بنزين زيادة بركوبي، على أمل إن حد يحس بيا ويقف لي من نفسه،  
والنتيجة إني كنت بمشي تحت رحمة الحر البشع والعرق والنهجان  
لحد ما أوصل مقطوع النَّفْس!

بعد فترة، ما بقيتش قادر أتحمل، خصوصًا في نهار رمضان، فاتجرات  
شوية تحت وطأة الإرهاق، وبدأت أشاور بخجل، لكن للأسف، مرة ولا  
اتنين بس اللي عربية وقفت لي، وفي أغلب الحالات، كانوا بيمرقوا من  
قدّامي بسرعة بدون حتى التفاتة، وأنا غرقان في الحرج!

مرة ورا الثانية قرّرت بشكل نهائي ما عدتش أشاور لأي عربية، ولا  
أستنى أي حد، وأكّمل لوحدي، مهما اتقورت من الشمس واتعميت

---

(1) قِطْنَا: عذابنا، صحيفتنا، حسابنا.

من العرق، أنا اللي اخترت الشغل ده وكنت عارف من الأول ظروفه  
فلازم أسترجل وأحاسب على مشاريبي للنهاية.

وده بالظبط اللي بيحصل في العلاقات فاقدة الأهلية، اللي فيها  
طرف بيسفّ حقوق الطرف التاني بسيف الحياء!

في الأول، بتستحي تطالب بحقك، وباللي المفروض يحققهولك، على  
أمل إنه يحس على دمّه، وتفضل تتحمل تبعات كل حاجة لوحدك،  
وتزق العلاقة لقدام، لحد ما تتعب في النهاية، وطاقتك تنفد، فتتجرأ  
وتطلب بخجل، لكنه -للأسف- بيبقى اتعوّد على الأخذ بس، وما  
عندوش أوبشن العطاء، فمرة يديك -مضطراً- عشان يخليك متمسك  
بالأمل - وعشر مرات يحرملك، لحد ما تصعب عليك نفسك وتأكد إنك  
بتحارب طواحين الهوا، فتقرر ما عدش تشاور له ولا تستناه أو تستنى  
غيره، ومشي الطريق وحدك، مهما اتقوّرت من الشمس واتعميت من  
العرق، لأنك مش عايز تتأخر أكثر من كده عن حياتك اللي تستحقها.  
فالسير من غير حمل على ضهرك، أفضل مليون مرة من إنك  
تمشي وشايل حد على قلبك!



إحنا بنظهر قدام الناس بالشكل اللي يقدرُوا يستحملوه، بنهدّب  
الهزيمة والحزن والخذلان ونقصص ريشهم ونطبطب عليهم ونحايلهم،  
عشان نقدر نبتسم، ونتعامل. اللي جوانا لو انعكس فعلا على وشوشنا،  
الناس هتموت من الرعب!



واعلم -أعزك الله- أن الوصلَ مقطوعٌ وإن طال، واللقا منفُضٌ وإن  
أينع، والتداني منبُتٌ وإن تكزَّر، فاسكن، وأقِم في الحال التي أقامك الله  
فيها، حتى تزول إلى غيرها، دون تدمرٍ ولا شِكَايَةٍ ولا تعجِلٍ ولا تنمِرٍ ولا  
تذَلِّلٍ ولا تطرُفٍ، فلا يعلم أحدٌ ما حُبِّي له، وهل ما استقبل من  
أيامه أفضل أم ما استدبر.



أكبر خطأ ترتكبه في حياتك: إنك تتكسف، أو ما تعرفش تتكلم  
عن نفسك، وعن قدراتك، وتسبب الآخرين يقيموك، وإنت فإكر إنهم  
هينصفوك ويّدوك حقك!

ماحدش بينصف حد، ولا بيدي له قدره!

الناس طول الوقت بتحكم عليك من خلال عقدها، وخلافاتها،  
ومشاكلها، ومزاجها الشخصي، وغيرها، وحقدها، لحد ما هتلاقي  
نفسك فجأة بقيت واقف في منطقة رمادية، مُخرج تتكلم وتقول إنك  
أكبر من كده، وفي نفس الوقت مش قادر ترضى بالمكان اللي حطّوك  
فيه، فتبدأ مرحلة عبثية جديدة من حياتك، مليئة بالصراع والنكوص  
ومراجعة الذات والإحساس بلا جدوى الحياة والرغبة في تحطيم كل  
شيء، والعودة لنقطة الصفر من جديد!

عشان كده تفضل مقولة الإمام علي هي الأعظم في مجالها: لا  
تدعنّ جهل الناس بك يغلب علمك بنفسك.



ولعلّ للإنسان أن يرى أحياناً ما تقود إليه الخيوط، لكنه يدّعي العمى، كي لا يغيّر وضعاً اعتاده، أو يتحمّل تبعات جديدة، أو يضطر للاعتراف بما يكره، أو اتخاذ ما يخالف هوى نفسه!

إنه يحب الظلام الذي يعيش فيه، ويكره من ينيره له!



بتسأل ازاي هو قدر يطّشك ويتجاهلك تماماً كده، وما يفتحش صفحتك على فيس بوك، ولا يتابع أخبارك، ولا عاد ليك مكان في حياته من بعيد أو قريب، بعد ما كنتم -حرفياً- روح واحدة في جسمين؟  
افتكر الحد اللي إنت حبيته قبله -في أي مرحلة من حياتك- وفقدت شغفك بيه -لأي سبب كان- وازاي قلبك جمد من ناحيته فجأة وما بقاش فارق معاك بأي شكل من الأشكال، ولا مهتم تعرف عنه أو ما تعرفش أي حاجة!

هو كمان تجاوز شغفه بيك زي ما تجاوزت شغفك باللي قبله، لكن إحنا اللي ما بنحشش بالظلم غير لما يكون موجه لينا بس!



آليات التدمير الذاتي اللي بنتبعها مع نفسنا بارعة للغاية ومتنوعة طول الوقت: التدخين، الشرب، النوم فترات طويلة لتجنب مواجهة أي شيء، الدخول في علاقات يائسة معروفة النهاية، إدمان مواقع التواصل الاجتماعي، العمل بوظائف لا بنحبها ولا بتشبعنا ولا بتضيف لينا أي جديد، وصولاً إلى استمرارنا في الدنيا بالقصور الذاتي فقط، وبلا أي خطة لأي شيء، لدرجة إننا بقينا بنتفرج على الحياة بس، مش بنعيشها!



بل إن بعضنا لو جات له الفرصة لتغيير ده، بيرفض، زي اللي عاش طول عمره في السجن وخايف يخرج لمايعرفش يتصرف!

وبعضنا بيتطرف في إيذاء نفسه، عشان يسد باب أي حل، ويكبّد نفسه خسائر لا يمكن تعويضها فيفضل واقف في نقطة الولا حاجة اللي على قد وجعها فهي على مقاسه، ومفیش فيها مفاجآت أو تغيير ممكن ما يقدرش يتكيف معاه!

ومع الوقت بنتأكد إن كلنا مرضى بدرجات متفاوتة، ومحتاجين مساعدة، بس مش عارفين نروح فين، ونطلب ده من مين، فنبداً -لا إراديا- نبعث رسائل استغاثة لكل اللي حوالينا، لكن بيصوا على ضحكنا وتمثيلنا ومداراتنا وما يصدقوش!

وفي الغالب، هنكمل كده: بحياتين، واحدة في النور وعلى السوشيال ميديا بربرق، والثانية في الضلمة: أشباح وآلام وأحلام مقصوصة الريش ووجع وفرص ضايعة وخذلان وأمنيات عارمة بالرحيل!



زي لما تشتري أكلة نفسك فيها وتدفع فلوس كثير، وتكتشف إنها سيئة جداً، ومع ذلك تقرر تاكلها استخساراً واستهانة بالضرر اللي ممكن يحصل لك بسببها.

فيه علاقات حب كده، رغم إنك بتدفع فيها مشاعر كثير ووقت وصبر وأحلام وتوقعات، بتكتشف إنها فالصو، ومش بتاعتك، وضررها أكثر من نفعها، ومع ذلك بتكمل فيها استخساراً برضه!

بس خلي بالك: الأكل المعيوب، ليه غسيل معدة، لكن الحب المعيوب ملوش غسيل قلب!



لو بتبذل مجهود كبير عشان تحتفظ بالطرف الثاني في العلاقة، وبتستحمل وتصبر وتطنش مواقف كثير، يبقى فيه حاجة غلط. فيه نغمة نشاز في اللحن، رقم ناقص عشان المعادلة تتحل. فالأصل في التواصل الإنساني: التكافؤ والندية، أقدم السبت تقدم الحد، أرخي في موقف، ترخي في موقف، لكن لو فيه حد متمسك أكثر من الثاني، معطاء ومضحى أكثر، يبقى غالبا مضحوك عليه وي يتم ابتزازه عاطفيا! صديقة كانت بتحكي لي عن حبيبها اللي ما كانش بيخرج معاها غير أول الشهر بس ويقول لها بهزار العزومة عليكي عشان تحلي المرتب، ويسيبها تحاسب فعلا، مع إنه كان بيبقى قابض برضه! وصديق بيحكي لي عن حبيبته اللي ما كانتش بتطبيقه يحكي لها عن مشاكله، فيما إنها ليل نهار ما بتبطلش شكوى من طوب الأرض! العلاقات دي شديدة السمية، وبتستنزف الطاقة تماما، والأسوأ إنها ما بتنتهيش بسهولة لأن دائما فيه مساحة من الشك إننا ممكن نكون ظالمينه، طب ندي له فرصة، طب نستني شوية، لحد ما العمر يتسرب من بين إيدينا زي قطرات المطر! إحنا بنحب عشان نلاقي نفسنا، عشان يبقى عندنا مبرر نصحى الصبح، عشان نتقدم وننجز ونتحقق، عشان نضحك ونطنطط من الفرحة ونرجع عيال، عشان يبقى بالننا مرتاح وقلبنا واثق ويقيننا مكتمل. فلو ما كانتش العلاقة بتقدم لك كل ده، يبقى تقف وتقلع ملط في وسط الشارع وتقول لهم: لا ده أنا أروح فيكم في داهية، وتقطع عرق وتسيح

دم وتهرب بقلبك وعقلك وإنسانيتك من الضلال ده، وتكرتهم وتقفل عليهم في خزنة حديد بكلمة سر، لحد ما تلاقي اللي يقدرهم صح. القلب مش بعزقة!



إحنا دايما أجبن من إننا نحقق أحلامنا، أو ندفع تمناها ونتحمل مسؤوليتها، وفي لحظة المواجهة هنخترع أي حجة في الدنيا عشان نفضل زي ما إحنا!

إحنا بستعذب الألم وبفضله في أحيان كثير حتى على نوال اللي بنتمناه من قلوبنا!

إحنا مختلين وملعونين وضعفا ونستحق عذابنا!



واعلم أن من البشر مَنْ لَمْ يُقَدَّرْ له -في هذه الدنيا- وصلٌ ولا حلٌّ ولا وصولٌ، لعنته أن يجري فقط، يُقارب فقط، يلمس فقط، حتى إذا حَمَّ القِطَافُ، مات الزرعُ، أو سبقه إليه سواه، أو قُصرت يداه عنه، أو قامت القيامة خصيماً على رأسه.. فاسكن ولا تجزع.



فيه ناس لما بتنسحب من حياتهم بيقولوا بركة يا جامع، وما بيحاولوش حتى يسألوا عن السبب، أو يتطمنوا ليكون حصل لك حاجة، أحسن ترجع!

في يوم من الأيام كنت عندهم مهم قوي وفارق ومختلف ولا غنى عنك، لكن دلوقتي ما بقوش عارفين هم عايزين منك إيه، فيسيبوك تنزلق من بين أيديهم عادي، بلا ندم، ولا محاولة لاستبقائك أو تفكير في اللي عملته عشانهم، ولا اللي كنت لسه مستعد تعمله.

هم عمليين قوي، وحسبتهم بسيطة ومباشرة: واحد بيروح وواحد يجي، والحياة بتستمر، ومفيش حد لا يمكن الاستغناء عنه. عكس حسبتك اللي هم كانوا ركن ركين فيها، وعدم تحضيرك ليوم يجي وهم مش في القلب من اهتماماتك.

إنت مش أهبل، ولا هم خاينين، لكن هي دي طبيعة الحياة، وكل واحد بيتعامل بأسلوبه وباللي يقدر يتحملة. مش كل الناس شبهك، ولا إنت شبه كل الناس، ولازم تتعود تتعامل مع النوعيات دي من الصفقات الخسرانة من غير أفورة ولا مظلومية ولا شحتفة.

أو زي ما كانت جدتك بتقول بتلقائية ووضوح مُطلق: الله جاب، الله خد، الله عليه العوض.

الله عليه العوض يا صاحبي.



لن نشفى وكل هذا الغضب داخلنا، الغضب من حماقتنا، والغضب من الفرص الضائعة، الغضب مما لم نفعل، والغضب مما فعلنا، الغضب من الماضي، والغضب من الحاضر، الغضب ممن نحب، والغضب ممن نكره. طاقة الغضب تُحرك العالم، وتصنع التاريخ، وتصنعنا، لكنها لا تنفك تحفر عميقا فينا، وتهوي بنا إلى القاع أكثر. من دون الغضب

نموت ونصبح نسيا منسيا، وبالغضب نموت ونصطي بنار الله الموقدة..  
ولا خلاص!



تأتينا السعادة أحيانا فنزديريها، نُعطيها ظهورنا، ونُقيم في وجهها كل متاريس الواجب والعُرف والمفروض. ويطرُق الحبُّ أبوابنا، فنُطيع الناس فيه، ونخضعُ للصور الذهنية التقليدية، والأفكار المُعلَّبة، التي أثبتتُ فشلها مئات المرّات، ونُطأطئُ لقيم مجتمعٍ واهٍ، لم يُعطنا قدرَ ما أخذَ مِنّا وانتهك خياراتنا، ومنحه مزيدًا من السُلطة على أحلامنا، التي لا نملك سواها، حتى يساويها بالعدم!

نتصوّر دائماً أن الفرصة ستأتي مرةً واثنين، أننا مختلفون وعاقلون وحكماء، مررنا بكل شيء، ورأينا ما يكفي، لنُحسن التصرف دائماً، نبالغُ في الركون لقوتنا الداخلية، وفرصنا مع الحياة، نتجاهل النذر والعلامات، نكبُتُ مشاعرنا، حتى نفقد الإحساس بها في النهاية!

المجتمع الذي خلقناه من كل ما هو قبيح وناقص وديكتاتوري و ضد وجود الإنسان، من مخاوفنا وهواجسنا وتقلباتنا وضعفنا وعجزنا، أصبح اليوم هو الربِّ، هو من يقود ويقرّر، ونحن نسجدُ له ونسبِّح بحمده، ونعلّق على شماعته جُبُننا، وهلّعنا من المغامرة والتفكير خارج الصندوق، وتأكيد حقوقنا في مواجهته.

إنسان العصر الحديث. يدخل النار مرّتين، مرة في الدنيا، لخدلانه نفسه، وعدم تصديق حدسه، وقهره الذين أحبّوه، ورفعوا له رايات المودّة، ومدّوا أكفهم نحوه، يبحثون عن سند، وعن معين وعن ثقب

صغير في جدار مُصمت. ومرة في الآخرة، لأنه لم يدخل جنة الدنيا، ومن لم يدخل جنة الدنيا، لم تطأ قدمه جنة الآخرة.



إننا نحاصر أنفسنا طول الوقت، ونصرُّ على الخيارات الخاسرة، وندفع بكل شيء إلى الحافة. كلما ازددنا اطلاعا على نقاط ضعفنا، تسللنا منها، وكلما لاحث لنا ثغرةً فينا انتهكناها. أعداؤنا ليسوا أخطر منا علينا، فهم يروننا من بعيد ويتسكَّطون أخبارنا بعناء، بينما نحن ننظرُ إلينا من الداخل، وننقلُ أسرارنا إلينا مباشرة، لنعرفَ أين يجبُ أن نطعنَ، وأين نقطعُ ونُسيلِ الدمَ.

منذ الخذلان الأول، ونحن نجتهدُ كي نجعله دائماً وأبدياً، فيتكسر الخذلانُ على الخذلان، وتتوهج المحنة، ويقتات الوجعُ على أرواحنا. لقد هُزِمنا وطُعِنًا ونُبِدنا، لأننا -منذ البداية- لم نعتقد أننا نستحق النجاح!



لما بتتجرح أول مرة، بتصبرَ نفسك بإنك اتطعمت خلاص وخذت حصانة، وفي وقوعك الجاي هتبقى أقوى وأكثر وعيا، لكن اللي بيحصل هو العكس تماما، لأنك ساعة الملامسة -لا إراديا- بتستدعي الجرح القديم وتوصله بالجديد في مساحة ممتدة من الخذلان.

مفيش حصانة ضد الألم، ولا مناعة من الوحدة وآخر سلام إيد وأخر بُق في العلاقة، هزايك هتفضل دايمًا هناك، في أبعد -وأقرب- نقطة من قلبك، مستنياك تقع وتركع، عشان تحفل عليك!



التفاصيل الصغيرة أكثر حاجة بتجرح بعد انتهاء العلاقات، يمكن لأنها بتتجمع وتتكاثر عليك في لحظات الوهن وتذبذب اليقين والوحشة والبحث عن علامة وطريق!

ويمكن لأنها كانت عفوية ومش مترتب لها ومش منتظرين من وراها حاجة فعمرها أطول وإيدها طائلة!

ويمكن لأننا ما بناخدش بالننا منها ونفهمها غير لما يبقى عندنا وقت كبير وتقبل بعد انتهاء كل شيء! ويمكن لأن تركيزنا طول الوقت بينصبّ على القرارات الكبرى والخطوات المصيرية فبتتزلق من قدام عينا وتستوطن المنطقة الضلّمة في المخ في انتظار لحظتها!

التفاصيل الصغيرة ما بتتنساش تارها، ولا بتفرط في حقها، بتديك كل الوقت اللي إنت عايزه عشان تهّمّشها وتكمل حياتك من غيرها، وتقتنع إنها أصبحت أثرا بعد عين، لحد ما الطريق يخلى لها تماما، فتطلع من حفرة النسيان على مهل، وبتؤدّ، وتكشر عن أنيابها وتنهشك!

التفاصيل الصغيرة.. هولكوست العلاقات المهزومة!



أحيانا بتبقى فيه حاجات لو عملتها هترتاح، لكن ما بتعملهاش، تشبّعك بالألم بيخلق بينك وبينه روابط خفية، لا إرادية في أغلب الأحيان، بتبّطك عن تغيير وضعك بكل الطرق، ولو أضفنا لده انعدام طاقتك، وعدم ثقّتك في أي شيء، واكتفاءك من كل شيء، هتبقى المحصّلة: خط طويل من اللامبالاة بالعالم، وانتظار المزيد من سخافاته بحياد،

وتساوي جميع الخيارات، وانتهاء جميع الطرق إلى نتيجة واحدة  
مفادها: مفيش فايدة!



إحنا بنختار غلط طول الوقت، بنختار الي مش هيمسك فينا  
ساعة ما نحتاجه، ويفكر في مصلحتنا زي ما يفكر في مصلحته، وبنبقى  
شايفين ده ومتأكدين منه، ومع ذلك بنكمل، بنمشي زي المنومين، وإحنا  
بنطمّن نفسنا إن المعجزة هتحصل أكيد، ويحبنا زي ما بنحبه، أصل  
ليه لأ، وإحنا قايدين له صوابنا العشرة حب!!

لحد ما تيجي لحظة المواجهة، لحظة الدخول من الباب الضيق،  
فنكتشف إن زيّنا زيّ غيرنا بالنسبة له: مجرد سلام، ممرّات، نفق  
بيعدّي منه للناحية الثانية لعبادة ذاته!



أكثر الحروب قسوة، تلك التي نخسرها  
دون أن نعرف حتى أننا دخلناها!



مهما قرّبت من حد، وتخيلت إن ماعادش بينكم حواجز، بتفضل  
واقف عند عتبة معيّنة، سِدْرَة منتهى ما بتتخطّهاش، فمهما بتتصوّر  
إنك فاهم الشخص ده وعاجنه وخابزه، وعارف كل حاجة عنه زي كَفّ  
إيدك، تصوّرْك بيبقى خاطئ وهزلي!

عشان كده بتتفاجئ في أوقات كتير بتصرفاته وردود فعله، وبتحس إنك ما تعرفوش، لأن دي الحقيقة فعلا: إنت ما تعرفوش!

طول الوقت، كل واحد منا جواه صراعات بيحاول يواجهها، ولعنات بيحاول يهرب منها، ومخن وانكسارات بيحاول يداويها، وجروح بيحاول يضمدها، وخيانات وخذلانات بيحاول يتخطأها، وده مش سهل، فلما بنتقابل للحظات في مشوار الحياة: بنخلق سياق مغاير لبي إحنا غرقانيين فيه، بس مش منفصل تماما عنه، ولا غير قابل للتأثر بيه، والانسحاق تحته أحيانا.

فيا ريت نكون أكثر رحمة ببعض شوية، أكثر فهما وتقديرا للضعف البشري، أكثر قدرة على الطبطقة وجبران الخاطر، وما نتعلاش على بعض، أو نستغل بعض، أو ننتهز الفرصة ونطلع غلنا في اللي قدامنا، أو نحاول نلبسه العمه ونخليه يحاسب على مشاريننا ويدفع من غلطات غيره!

قليل من الرحمة فقط ما يحتاج إليه أحدنا من الآخر في محنة الحياة، ليس الفهم الكامل، ليس المعونة الكاملة، ليس الدعم الكامل، فقط قليل من الرحمة، لتصبح أوقاتنا محتملة ولو درجة واحدة أكثر مما قبل لقائنا، وإلا فلا قيمة لهذا اللقاء، وقلته أحسن!



أكثر حاجة بنفتقدها في اللي سابونا ومشيووا: إنهم ما عادوش هيعرفوا عننا أي حاجة؛ انتصاراتنا الصغيرة، هزايما، دموعنا، وحدتنا، كوابيسنا، وجع قلوبنا لما النور يقطع، رعشة إيدينا لما العصفور - آخر ما تبقى منهم- يموت في القفص، عيوبنا اللي عالجنها عشانهم

ومخاوفنا الي اتغلبننا عليها بسببهم، طموحاتنا الجديدة وأحلامنا  
لبكره، لبسنا الجديد عشان نعجبهم، الأغاني الي بقينا نحَبِّها بفضلمهم  
وشوقنا الجارف ليهم الي ما عادش من حقنا نعبر عنه!

زي ما نكون ما اتقابلناش في العالم ده، أو اتقابلنا صدفه في مواصلة  
من غير ما حد فينا يلفت نظر الثاني، أو اتقابلنا وعيننا جت في عين  
بعض بس ما حدش عرف الثاني!

كانقطاع الحبل السُرِّي بينا وبين أمهاتنا مرة واحدة وللأبد،  
والاضطرار لمواجهه قبح العالم بمفردنا تمامًا، وتحمل نصيبنا من  
المسؤولية الثقيلة، رغم عدم استعدادنا لذلك نهائيًا، رغم عدم رغبتنا  
في هذا نهائيًا، ورغم أن القلب -ذلك الهش الهش!- لم يعد قادرًا على  
مقارعة كل هذا الوجع!



ساعات بتزعل على الفراق.. مش عشان انتهاء الحكاية، لكن عشان  
كنت مؤدب بزيادة وإنْت واخذ شنطة ذكرياتك وماشي، وما هزأتش  
الطرف الثاني ومسحت بكرامته الأرض، وواجهته بحقيقة انتهائته  
وجبنه، واستحقاقه اللعن مع كل المهوسين بالأخذ دون العطاء، وتعشيم  
الناس -كذبا- بالنوال دون الوفاء، واللعب -عمدا- على كل الحبال،  
وعدم أهليته لتحمل علاقة حقيقية.

لكن.. تدور الدوائر دائمًا وتتبدل الأدوار في أي لحظة، فإذا الظالمُ  
مُنْتَهَكُ مخذول، والمظلوم مجبورٌ مسرور، والله من وراء الكل حَكَم  
وقدير.



لم أنسك يوماً، لكن غيابك أصبح كالعاهة المستديمة، كل يوم أستيقظ صباحاً لأنظر إليها، ولا أجد شيئاً في يدي لأفعله، فأشد الغطاء على عيني.. وأنا!



إننا بارعون في خداع أنفسنا، وصنع عالم كامل من الأوهام والصور غير الحقيقية، أساتذة في التقمص والتلهي واصطناع الحالات والمشاعر، والدخول من الأبواب الضيقة والشوارع الخلفية، فنانون في عدم الاعتراف بالواقع، والإصرار على حبس أنفسنا في فكرة، أو لحظة، أو حالة، لا عن كراهية لذواتنا، أو رغبة في التنكيل بها، لكن طمعاً في تحقق ما نحتاج إليه بشدة، وخوفاً من تغيير أوضاع اعتدنا عليها، وفزعاً من الخروج من المألوف لعشوائية الاحتمالات، ورعباً من أكبر شبح يخيفنا جميعاً بلا استثناء، ونهرب من الاعتراف به طول الوقت: الوحدة!



نحن لا شيء بالنسبة لبعضهم، لدرجة أنهم يتخذوننا مَعْبَرًا ينفذون من خلاله للطرف الآخر من التجارب والخيارات، ثم لا يكلفون أنفسهم حتى النظر إلى الوراء ليروا كيف أصبحنا أو كيف سنتعامل مع حقيقة أنهم -حرفياً- استعملونا ثم تخلصوا منا دون مبالاة!

عدم الإنسانية في مثل هذه التصرفات لا يقدر فقط في هؤلاء الأشخاص، إنما في الإنسانية عموماً التي أنجبتهم وأمدتهم بأسباب البقاء والخداع حتى اللحظة التي كشفوا فيها عن وحشيتهم، ثم هي تستمر في مداراتهم ونفعهم حتى يقرروا هم أن يكتفوا أو لا يقرروا!  
أيام شريرة!



عندما تجلس لتراجع دفتر الخيبات، وتقلّب أوراق الهزيمة، وتحاول تحديد مساحة الجرح التي تزيد باطراد، ووضع رقعة جديدة على ثقب الروح التي تتكاثر ذاتيا، وتتساءل: هل أحبنا أحد من قلبه حقًا؟ تكتشف كمّ المغالطات المرعب الذي بلعته سعيًا، والمواقف، والعبارات والأحوال التي كان ينبغي لك الوقوف عندها، ولم تفعل، والأوهام التي كنت تنسجها وتعيش في ظلّها، دون حساب أو مراجعة، والنذر والعلامات والإشارات التي لم يكف الكون كلّ يومًا عن إرسالها لك، ولم تكف يومًا عن تجاهلها، لقد كنت أنت أكبر عدو لنفسك وليس الآخرين، عندما لم تقدر ذاتك حق قدرها، وعندما سمحت لمن لا يستحق أن يدخل حرمك، ويسكن قلبك، عندما عشت كفيًا وأنت بصير، وأصم وأنت سميع، وحزينًا نافرًا موجدًا مستلبًا وعلى هامش الحياة، وأنت خليفة الله في أرضه، فيما أكملوا هم طرقتهم وأقدارهم، وعبروك بلا لحظة تردد واحدة، كأن لم تُخلق، أو تلتقي عيونكم ذات حبّ، واليوم أنت -اعترف- لا تدفع ثمن طيبة قلبك ولا حبك ولا تضحيتك ولا إيثارك، إنما ثمن غباثك.



أحيانًا لا تكون المشكلة الكبرى في الفراق، إنما في سهولة التخلّي، وسرعة البيع، ودقة توجيه الطعنة للقلب -فلا تقوم له قائمة بعد ذلك- في هوان الأيام الحلوة، وسرسة الذكريات كحفنة ماء من بين أصابع مفتوحة لا مبالية، في مفاجأة الفقد دون توقّع، والعودة بلا وليف على غير انتظار، والاضطرار لبدء كل شيء من جديد!



فيه ناس وهي طالعة من حياتك، بتثبت لك إنك كنت حمار مرتين: مرة يوم ما عرفتهم، ومرة يوم ما أدركت استحالة استمراركم مع بعض، ومع ذلك كملت، خوفًا عليهم، وعلى ذكرياتكم سوى، وعشان كان عندك أمل يحسّوا على دمّهم، ويبقوا بني آدمين في الآخر!



الي بيعدوا بمزاجهم فجأة، ويخطوا حدود بينا وبينهم من غير تبرير ولا استئذان، لأجل غير مسمى، لازم يتحمّلوا العواقب بعد رجوعهم: ممكن نكون لسه زي ما إحنا، وممكن نكون اتغيرنا وبقينا ناس تانيين، ممكن نلاقي مساحة ليهم ونتقبلهم زي ما هم، وممكن يكون أوانهم فات وأواننا بدأ.

ما دمننا ما كئاش طرف في قرارهم بالبُعد، مش من حقهم يبقوا طرف في قرارنا بالاستمرار معاهم من عدمه.



الي بيسحلونا معاهم، ويخلّونا نتمّى الموت ساعات على وضعنا معاهم -الي هو لا أون ولا أوف!- مش شرط يكونوا بيعملوا ده بوعي وبنية مبيّنة للإيذاء.

كلّنا فطرتنا اتشوّهت وما بقينا ناش قادرين نشوف صح ونختار صح ونقرّر صح، كلّنا بقينا عاجزين نشوف الخط المستقيم أقرب طريق بين نقطتين واتعوّدنا نلف وندور حوالين الحاجات!

وساعات بيبقى مجردّ سوء حظ إننا نقع مع حد بيئذينا غصب عنه، وهو مش فاهم ده، ومش بيعمله عمدًا ولا فاهم بيعمل كده

ليه، صحيح ده ما يعفيهوش من المسئولية ولا بيخفف الوجد طبعاً، بس معرفتنا بده، على الأقل بتحط النقط على الحروف وتهدم أسطورة المظلومية اللي عايشين فيها طول الوقت واعتقادنا الكلاسيكي بعدم أهليتنا للحب.

المشكلة أن القلب لم يعد يتسع لمزيد من الطعنات والبهاليل والمجانين والمخادعين والأفاقين والقُصّر والضالين والمرضى والمترددِين والباحثين عن تجارب مسلية والمعوقين فكرياً والهائمِين والخاذلِين! لم يعد يتسع!



محتاجين نقتنع إن الحاجات مشيت ومش راجعة تاني، والأشخاص فارقوا حقيقي ورموا جذورهم في قلوب غيرنا واتخطونا، والطرق القديمة انتهت فعلياً تحت رجلينا ومهما عاندنا القدر وكملنا فيها مش هتوصلنا لأي مكان.

لكن اعتقادنا الطفولي إن كل حاجة تمام ومفيش شيء اتغيّر وإنها مسألة وقت بس وكله هيظبط، بتحسنا في دايرة اللافعل للأبد، وتخسرنا مش بس اللي موجود بالفعل لكن اللي جاي بعد شوية كمان، وبرضه اللي راح مش راجع!  
الي راح مش راجع.



(أسهل حاجة ييعملها الرجل في العلاقة اليومية دول: يهرب!)

ياخد اللي فيه النصيب ويقفل تليفونه، يعمل بلوك، يختفي، من غير ما يوضح بقى، ولا يبرر، ولا يصون العيش والملح ولا يقفل الأقواس المفتوحة ولا يجاوب علامات الاستفهام.

يهرب وبس، واللي يحصل يحصل!

الرجل عموما ما يبحبش يحسم، يمكن يحتاج العلاقة دي في يوم، يمكن الظروف تتغير، يمكن يجد جديد، فيحاول تاني يوصل الود، وساعات بينجح!

والثغرة الوحيدة في الحكمة دي: ربنا اللي ما بينساش، واللي بيدبر الأمر من فوق سبع سماوات، واللي قادر في لحظة يقلب الترابيزة على دماغ اللي ظلم واستهون وباع واستندل.

ساعات بنحس بضيق وخنقة وعدم قدرة على الاستمتاع بأي شيء، وما بنبقاش عارفين ليه، لكنه في الغالب بيكون ذنب ارتكبناه ونسيناه، قلب مسالم وأليف جرحناه في عز ما كان محتاجنا، مساحة بيضا لونها بسواد قلوبنا بدون مبرر.

بمعنى آخر: الفواتير كلها لازم هتتسد هتتسد، فادفعها بنفسك وفي ميعادها، قبل ما تتسد غصب عنك بفوايد باهظة ما تقدرش عليها.



أكبر غلطة بنرتكبتها عمومًا في العلاقات: إننا بنعرض نفسنا!

يعني بنبادر بالإعراب عن المشاعر بعفوية، ونطلب نبقي مع بعض على طول، ونقترح نشاطات مشتركة نعملها سوا، ومساحات للمودة نكون فيها مع بعض، اعتقادًا إن تقييم الطرف الثاني هيكون زي تقييمنا للموضوع بالظبط، فيلا بينا نستمتع. (أمال بنتنيل نحب ليه؟!)

بس في الوقت اللي بيبقى قصدنا حاجة، يفهم هو حاجة تانية، ويستخف بينا وبحماسنا، وبيعتبر دي علامة على إنه أصبح شخص ما نقدرش نستغني عنه في حياتنا، ما يخوّله سلطة أكبر في التعامل معنا، ويدي له صلاحيات ما خطرش ببالنا نديهاله، وصولا لإنه ممكن يزهدنا في اللحظة التالية لما يحس إننا مدلوقين عليه كده، وإن ما بقاش فيه تحدي يخوضه عشان ينال إعجابنا!

بمعنى آخر: العفوية والتلقائية في التعبير عن المشاعر، والصدق والأريحية والطيبة، غالبًا بتودّي في داهية، لكن الخبث والحوارات والتقل والصنعة والإيحاء باننا مش فاضيين له طول الوقت وإن لينا عواملنا الخاصة وحياتنا، وكرم أخلاق منا بس إننا بندي له شوية وقت منها، هيخليه مشدود زي الوتر طول الوقت ومستني منا إشارة عشان يجري يلبي احتياجاتنا وهو مبسوط وحاسس بالإنجاز!

حكمة العدد: "التظاهر" و"الادّعاء" في العلاقات -للأسف!- سيّد

الأخلاق!



اللي ما بيعرفوش يتعاملوا مع جانبك المظلم: مرتزقة مش أحباب،  
بياعين بالقطعة مش تجار شاطرين التجربة علمتهم ياخدوا كل حاجة  
باكديج واحدة وبعدين يتصرفوا!



فيه حاجات/قرارات بتفضل تهرب من إنك تعملها، أو تقرّب منها  
حتى، لأنها آخر حاجة متوقّع إنها تبهجك، وتغيّر مودك، وتحرك  
مشاعرك، فبتفضل تأجل فيها، وتماطل، وتسوّف، وتتحجّج، لأنك خايف  
تعملها وبرضه ما تحسّش بحاجة، وما تلاقيش نفسك، فتفقد آخر  
أمل في الخلاص!



الهاجس الأكبر لينا، إننا نعدّي على الدنيا بلا بصمة ولا أثر، وما  
نبقاش فارقين مع حد!

يمكن عشان كده بنحب ونكتب ونغني ونرسم ومثل ونرقص  
ونكتب على السوشيال ميديا ونعمل مشاريع، عشان حد ياخذ باله  
مننا، ويلاقي صفات مشتركة معنا فيشاركنا الرحلة، وتتسند على بعض.  
وللسبب نفسه بنتجنن لما نكتشف زيف اللي كنا فيه، والخذلان  
بيبقى مضاعف، لأنه فرغ كل اللي حصل من معناه وخلاه قشرة،  
عيرة، عدم، وخوفنا من اللي جاي، ولخبطنا، وخلصنا مترقبين النهاية  
نفسها ولو بعد حين!

إحنا في منتهى الهشاشة.. منتهى الاحتياج.. منتهى الطفولة.. وفي الغالب بنرضى بحاجات عبيطة وهبلة لو كانت صادقة ومن غير ماكياج.

لكن على الجانب الآخر، بعض الناس حساباتها أكثر تعقيدا، ودخولهم حياتنا يبقى مشفوع بخطط وتوقعات ومكاسب وتطلعات وليلة كبيرة سعادتك، وللأسف ما بنكتشفش ده دائما غير بالطريقة الصعبة! والمشكلة الأكبر مش إن الحياة صعبة، لكن إنها كان ممكن تبقى أجمل من كده بكتير، وأحلى، وأكثر حقيقية، لو حاجات بسيطة اتغيرت، وناس بعينها فضلوا معنا وكانوا قد كلامهم ووعودهم اللي ما أجبرنهومش عليها بالمناسبة!

ورغم إن الكل بيخسر في النهاية، حتى اللي عامل نفسه بُرم وفاهم كل حاجة ومسدد كل الخانات، ما حدش بيتعلم ولا بيستوعب الدرس، وليوم القيامة هيفضل الإنسان أغبى من إنه يدرك قد إيه الحياة تافهة وهينة ومش مستاهلة اللي بنعمله في بعض ده والله!



فيه درجة مُرعبة من الوعي المُفْرِط بما يدور حولنا، بتخلينا عاجزين أحيانا عن إصدار رد فعل على مستوى الحدث اللي بنتعرض ليه!

كأن أعصابنا هي التي بتغطي جلودنا -مش العكس- وبتستجيب لكل شاردة وواردة بأعلى درجة من الحساسية والإدراك!

وفي الوقت الي بنبدو فيه متبلّدين أمام الآخرين أو عاجزين عن الفهم، بنكون خطفنا رجلنا للماضي وافتكرنا كل هزايما المماثلة، ومدّينا شوية للمستقبل وشوفنا نهايات الأشياء والمصير الي مستنينا!

وساعة ما بنوصل لسقف الانفعال، لأعمق حته في الخذلان، لأقصى منطقة في المكابدة، بنفقد اهتمامنا تماما بكل شيء، وبتستوي كل الخيارات، وبتتلاقى كل الطرق، حتى الوجد والفقد والخيانة والرجوع لنقطة الصفر ودفح تمن مشاريع غيرنا والنهيات الباردة الخالية من الدسم.. بتبقى مش مهم، وعكس المتوقع، بتتكوّن طبقة من الصلب على قلوبنا، ما ييقاش سهل أبدا إن أي حاجة تخترقها مستقبلا، حتى لو صادقة، حتى لو حقيقية..

درع.. بنكسب بيها حياتنا وأيامنا الي جاية..

لكن بنخسر قدرتنا على الحب!



وصولنا للنهيات الكبرى للأشياء/العلاقات/المواقف، على قد ما بيبقى مُرعب ومَهول، وبتنقّيه طول الوقت، وبنأخّره على قد ما بنقدر، على قد ما بيكشف لنا آخرتها إيه، وبيحطنا أمام أسوأ كوابيسنا على الإطلاق، وبعدها ما بيقاش فيه حاجة نخسرها!

وساعة الذروة -عكس المتوقع- جسمنا بيبقى متورط تمامًا في الحدث، بكل طاقته وجوارحه وكيميائه، وحريص على إصدار ردود الفعل المناسبة، فيما القلب فارغ تمامًا، مُتعالٍ عن الحدث، محلّق، كأنه في كون موازي، حاسس بالراحة الأبدية، والسلام مع الكون كله، بلا حقد ولا ضغينة ولا خوف ولا انكسار.



لأن القلب لو تورّط هو الآخر في المعمعة، هيفتفت، ومش هنلاقيه تاني، فبيعزل نفسه عمدًا، بيشغل مزيكا ويشرب شاي ويدخن سيجارة في البلكونة، على ما اللحظة العصبية تنتهي، وبعدين يستلم الزمام مرة تانية، لما يبقى قادر يستوعب ويواجه، ويقوم بدوره.

الثُغساء اليي قلوبهم ما بتعزلش، وبتتورّط في اللحظة بكل جنونها وشجنها، بتنصهر مع الأحداث، وتموت.  
وبيعيشوا عمرهم الباقي كله.. زومبي.



كُتر الخذلان والخطأ في الحكم على الناس والمشاعر المهذرة ونفاد الطاقة، بيخليك -مع الوقت- تعمل سور حوالين نفسك، وتعزف عن التجربة، وتبطل تغامر وتدّي فرص لتي يستاهل واللي ما يستاهلش على حد سواء، بعد ما إحساسك بالأشياء انعدم وبقت المحطات كلها شبه بعض.

واللطيف إن اللي تسبب في تحولك ده ممكن يكون أول من يتهمك بالغرور والتعالي، جهلاً أو حمقاً أو مزايده أو اصطيادا في الماء العكر، لكن بتكون بطلت تهتم بكلام أي حد أو تتأثر بيه.

ومع الوقت بينخفض سقف أحلامك، وما بيقاش المطلوب حد تشعر معاه بالسعادة، لكن -زي ما بيقول علي سالم- حد تشعر معاه بأقل قدر ممكن من الألم!



في الغالب، لم يكن لأحدٍ أن يجرحنا،  
لو لم نسمح له بذلك!

التجارب التي نتعافى منها هي التي نستطيع تحديد مدخلاتها ومُخرجاتها بوضوح: ماذا قَدّمنا وماذا أخذنا، وكيف وصلنا إلى هذه النقطة، ولماذا. الحدود فيها -وإن كانت مؤلمة- واضحة ولها مبرراتها. أما التجارب التي تُموت ونحن نزحف للخروج من بين براثنها دون جدوى، فهي تلك التي لا نملك كشف حساب لها، فلم نعرف كيف تورطنا فيها، ولا لماذا تحمّلنا كل ما جرى لنا خلالها، ولا إن كانت قد انتهت بالفعل، أم أنها في فترة كمون عابر لن تلبث أن تنهض منه لحظة نوشك على الخروج منها لعلاقة صحية أكثر.

لكن المشكلة الحقيقية أن العمر يمضي أسرع مما نتخيل، والطاقة تتبدد، والقلب مثل القلم الجاف الذي تُفرغه كثرة التجريب والشخبة، حتى إذا احتجنا إليه لكتابة قصة عمرنا، لم نجد به ما يكفي لتدوين سطر واحد فيها!

وليس أكثر بؤساً من أن تضحك على نفسك بسعادة زائفة، قوامها نسخ الأشياء والأشخاص والحالات، كي تسدّ جوعك للونس!

إحنا فقدنا قدرتنا على الاستمتاع بالحياة يوم ما فقدنا قدرتنا على  
وضع أهداف طويلة المدى لوجودنا.

يعني الأكل واللبس والنوم والشغل والفُسح والعلاقات، أهداف  
قصيرة المدى، ومهمّة جداً، بس كده كده بتخلص وتتجدد كل فترة  
بأشكال مختلفة وبصيغ مغايرة. لكن إيه الي وراها؟

بمعنى آخر: بناكل ونلبس وننام ونشتغل ونخرج، عشان نوصل  
لإيه في الآخر؟

إيه "الفاينال دستنيشن" الي عايزين نروح له؟

إيه النقطة الي هنتوقف عندها ونقول إننا أنجزنا وحققنا،  
ونلتقط أنفاسنا عشان نبدأ رحلة البحث عن نقطة تحقق أخرى؟  
مفيش!

لما تتكلم مع حد تلاقيه مفرّغ وجوده تماماً من أي قيمة.

معطّل ملكاته وقدراته ومسلّس نفسه في احتياجات بيولوجية  
بحتة دون أي مردود آخر!



أسوأ ما في الدنيا: الفُرص "المواربة" التي لا تأتي حتى نعرف إذا  
كانت فرصة فعلاً أم لا. ولا تذهب، فنُخرجها من حساباتنا، ونبدأ  
البحث عن غيرها!



أغلى الأشياء كأرخص الأشياء، تنتهي الحاجة إليها بامتلاكها.



لماذا أغضب من الذين خذلوني، إذا كنتُ أنا نفسي قد خذلتني؟!



يا الله.. لماذا منحنتني هذا القلب الذي يحنُّ أكثر مما يغضب،  
ويسامح أكثر مما ينتصر لكرامته، ويلين أكثر مما يقسو، ويدنو أكثر  
مما ينال، حتى استحالت حياته ركضا من وجع إلى وجع، ومن عشم  
إلى عشم، فأقام في الخوف وفي البلية وفي الانتظار، وكلما انداحت أمامه  
الجنة حتى أوشك، والنوال حتى مد أطراف أصابعه.. حُجِب!

لماذا خلقت الحب والفرق والبدايات والنهايات والأمل واليأس  
والحزن والمسافات والعشم والخذلان؟!

لماذا خلقتني؟!



فإذا فُتِحَ البابُ.. تَشَاعَلَتْ، وإذا أُغْلِقَ.. هَمَمَتْ. إذا لاح ثقبٌ يعافر  
فيه النور.. جَقَلَتْ، وإذا أطبق الظلامُ.. فَرَعَتْ، إذا بَدَتِ المحبَةُ..  
تغافلت، وإذا حضرتُ البغضاءُ.. اشتقت. إنه قلبك الذي لا يعرف ماذا  
يريد من العالم، ولا يعرف أنه لا يعرف!



لما تلاقي كل الناس بتضربك بالقلم.. أول واحد هيبوس خدك  
هتجبه ولو كان إبليس!



هل أحببنا حقاً، أولئك الذين تركونا خلفهم دون تردد في اللحظة  
التي استطاعوا فيها الوقوف على أقدامهم دوننا؟

الذين لم يكلّفوا خاطرهم يوماً بالتفكير فينا، وما آل إليه حالنا  
بعدهم، ولم يشغلوا بالهم بأي مما شاركناهم فيه عندما كنّا نعني  
لهم الكثير!

الذين لم يتذكرونا عندما استمعوا إلى أغنيتنا المفضلة، أو دمعت  
أعينهم عندما زاروا الشوارع التي احتضنت أقدامنا، أو أحسوا بنغزة في  
القلب عندما قابلوا الناس الذين شهدوا أيامنا معاً، أو تنهدوا في أسى  
عندما طوّفت حولهم ذكرى لنا!

الذين مضوا كأن لم يخلقوا، وعبروا كأن لم تتقاطع طرقنا يوماً،  
واختفوا كأن كانوا حلماً تبدد إذ فتحنا أعيننا على ضوء النهار القوي!  
هل؟!



اللهم لا تربّنا بالفقد، وزوال النعمة، وكشف المستور، وتغيّر الحال،  
وانقطاع الأمل، وعسر المعيشة، وأعدنا إليك يا رب من باب اليقين  
فيك، والأنس بجلالك، والشوق لرحماتك، وتجلّي آلائك، والطمع فيما  
عندك، والزهد فيما عند سواك.

